

La sumbriva da Stalin

La nostalgia nutrescha il naziunalissem russ

DA GUIU SOBIELA-CAANITZ

■ **Co vai cun la Russia? Quai ans regarda, e co! Lez pajais, il plü vast dal mund (passa 17 milliuns km²) è mo 1620 km da nus en lingia directa, ma tranter ses cunfin cun la Corea e quel cun la Norvegia datti strusch 12 000 km en lingia directa. Areguard la populaziun (143 milliuns olmas) cuntanscha'l oz mo il 7avel rang, sunter la China, l'India, ils Stadis unids, l'Indonesia, il Pachistan e la Brasilia. La Russia sco republica independenta datti pir dapi la fin da 1990; 1922–1990 furmav'la la part principala da l'Uniu sovietica (US, cun var 22,3 milliuns km² e 287 milliuns olmas dal 1989). Tiers vegnivan ils sis vasals commembers dal patg da Varsovia, plinavant la Cuba e Mongolia. L'US era vairamain in stadi russ. Russas eran la maiortad da la populaziun, la chapitala, la regenza, la lingua cuminaivla e diplomatica. Quels Russ che vegnivan a star en in lieu sovietic d'auter linguatg na basegnavan betg da l'emprender. Ils Russ eran loschs da la victoria da 1945, cuntanschida d'in'armada nua ch'ils cumandants suprens eran bunamain tuts Russ; ins emblidava gugent l'agid decisiv dals Stadis unids areguard armas e material. Ils Russ eran loschs dal «sputnic», l'emprim satellit artificzial, tratg 1957 da l'US, e da l'emprim cosmonaut Juri Alexejevitsch Gagarin (1934–1968) ch'è i 1961 enturn noss planet en la nav spaziala «Vostoc». Igl è cler ch'ils Estons, Tschetschens, Usbecs euv., opprimids dal stadi russ, na savevan betg divider quella luschezza dal pievel dominant.**

Oz datti anc adina in stadi russ cun Moscau sco chapitala, ma sia populaziun è mo pli la mesadad da quella da l'US 1989. L'US sa fundava sin la ductrina comunista; questa ha disditg, persunas e gruppas curaschusas defendan ils dretgs umans en Russia, ma la maiortad dal pievel na para betg d'aderir a nossas valurs democraticas. Davart sia situaziun spiertala e las stentas da president Vladimir Vladimirovitsch Putin per flattar ils naziunalists, infurmeschan dus essays en il davos numer da la revista edida da «Renovabis», l'acziun da solidaritad dals catolics tudestgs, e dal Comité central dals catolics tudestgs (1). Ils auturs èn il politolog Paul Roth (Minca), professor a l'Universitad da la «Bundeswehr», e Markus Wehner, anteriur correspondent a Moscau da la «Frankfurter Allgemeine Sonntagszeitung».



Stalin ha anc adina adherents en sia patria.

KEYSTONE

La victoria da 1945 fundescha l'identitad

Roth rapporta: «Ins tschertga in'idea naziunala che possa remplazzar la ductrina da Marx e Lenin (...) e dar ina basa spiertala u ideologica cuminaivla a la Federaziun russa (...). Era la commemoraziun festiva da la victoria sin la Germania da Hitler avant sessanta onns fa part da lezza retschertga d'in'idea naziunala» (p. 64). L'autur menziuna l'ideologia uscheditga «eurasiatica» che ha sa deraçada en Russia suenter la fin da l'US: «Ils 'Eurasians' regardan la Russia sco in pajais unic nua che la politica e cultura da l'Europa e quellas da l'Asia han s'unidas durant ils tschientaners. Perquai manegian els ch'ins tradeschia l'identitad russa sch'ins sa drizza tenor l'Occident e sa lascha influenzar da lez. In sectur tuttafatg different gida ils 'Eurasians' cun arguments, numnadamain il patriarcato ortodox da Moscau; (...) tar el strasanun vuschs che la corrupziun moralà saja vegnida da l'Occident» (p. 65). La medema critica drizzan dal reminent ils islamists a l'Occident. Il pievel russ para d'avair emblidà u d'ignorar la terror sovietica dals onns trenta: «Tenor ina retschertga che l'institut demoscopic 'Le-

vada' ha realisà 2003, sustegnan 36% da la populaziun la tesa suandanta: «Ins po imputar sbagls e malfatgs a Stalin, ma il fatg principal è che noss pievel ha remportà la victoria en la guerra sut sia direcziun» (cità p. 66). In sociolog da 'Levada' commentescha: «La victoria en la 'Guerra grondra per la patria' è la noda principala d'identitad en Russia, l'unica pitga positiva da la schientscha naziunala en la societad. Lezza victoria legitimescha il totalitarissem sovietic cun vigur retroactiva (...). Fin ad oz vala il tabu ch'ins n'astgia betg s'occupar cun las varts sumbrivaunas da la victoria» (cità p. 68). Ina vart sumbrivauna è il fatg che l'US ha sa patrunada da vasts intsches tranter il Mar nair ed il Mar arctic, suttamiss ad in ferm squitsch social, politic e cultural. Patgs internaziunals han sur-laschà a la Russia la regiun da Calinigrad/Königsberg e las sdrimas finlandaisas annectadas durant la guerra mundiala. L'Estonia, la Lettonia e Lituania perencunter èn puspè independentas, sco gia fin a 1940, ma la Russia refusescha da renconuscher che lur annexiun saja stada illegala. Markus Wehner: «Putin riguarda lezza annexiun (...) sco in'adesiun libra da quels pajais a l'US. El sne-

ga in mez tschientaner d'occupaziun colliada cun terror, deportaziun da la classa dirigenta, oppressiun culturala ed absenza permanenta da libertad» (p. 33).

Da Bielorrussia a l'Abhasia

Putin definescha la fin da l'US: «La tragedia la pli gronda dal 20avel tschientaner» (cità p. 32). El tira a niz tuttas occasiuns da gudagnar puspè influenza en parts da l'US e da l'imperi dals zars d'antruras. Ses success principal en quest regard ha'l gi para en Bielorrussia (var 10 milliuns olmas), nua ch'il dictatur Agliaxander Lucaschenca na savess segir betg salvar sia pussanza senza l'agid russ. «The Economist» dals 18 da mars 2006 cite-scha in schef da l'opposiziun democratica bielorrussa (p. 27): «Putin n'ha betg gugent Lucaschenca, mo revoluziuns ha'l anc pli pauc gugent». Ma tge vistas ha lezza dictatura en noss tschientaner electronic, en in pitschen pajais limitrof da Lettonia, Lituania e cunzunt Polonia? Per Putin datti vistas d'in domini pli duraivel en in pajais anc blier pli pitschen (230 000 olmas), ma strategicamain pli relevant, numnadamain l'Abhasia, tranter il Mar nair ed il Caucasus dal vest, visavi la Turchia dal nordost. Cun la guer-

ra da 1993 èn var 200 000 Georgians fugids da l'Abhasia, nua ch'i han strusch pli vistas da turnar. Ils plis avdants da l'Abhasia han oz passaports russ. Putin ha cumpareglià quest pajais cun il Cosovo. Ils avdants da l'Abhasia han uschè paucas mustgas da viver aifer la Georgia sco quels da Cosovo da turnar sut il domini serb. Dalonder las speranzas da Putin. Il Cussegl da segirtad da l'ONU duai fixar anc 2006 il futur da Cosovo. Ins vesa mo l'independenza sco schliaziun realistica, tant pli che la votaziun dals 21 da matg en Montenegro pudess oramai manar a l'independenza da quest pajais sper il Mar adriatic. Ma la Russia cun ses dretg da veto savess impedir ina tala decisiun per il Cosovo. Ins smina che Putin pudess desister d'in «na», bandunond sia aliada tradiziunala serba, e pretender per la paja che la Georgia renunzia a l'Abhasia; questa restass lura vasala da Russia.

La madritscha atomica dals ajatollahs

Tut quai para tant pli probabel che Putin gudogna pussanza e confidenza en sazez grazia al pretsch adina pli aut dal petroli sin la fiera mundiala. «La Russia è vegnida il pli grond producent mundial d'energia» («NZZ» dals 29 d'avrigl 2006, p. 8). «Moscau sa resguarda puspè sco pussanza mundiala e vul ch'ins altracta sco ina tala» («Financial Times Deutschland», 28 d'avrigl 2005, p. 35). Er en l'Orient chatta Putin fastiz da Stalin, cur che l'US era limitrofa da l'Iran ad ost ed a vest dal Mar caspic. 1941–1946 ha Stalin occupà ina part da l'Iran. 1945 ha l'armada sovietica gidà autonomists da l'Aserbaigian iranais, tranter il Mar caspic ed il cunfin tirc, a proclamar in'atgna republica. Pir la pressiu da l'ONU ha obligà Stalin a retrair sias truppas. Oz è l'Iran (passa 66 milliuns olmas) ina pussanza regionala e la Russia dapi onns «la madritscha da sia politica nucleara» («Frankfurter Allgemeine Zeitung» dals 27 d'avrigl 2006, p. 7). «Ils 27 da favrer 2005 han l'Iran e la Federaziun russa sutscrit in patg davart la furniziun da combustibels atomics per la centrala nucleara da Buschehr, erigida da vart russa» (2). Putin sa grà che l'Iran na gida betg ils rebels tschetschens. Igl è cler che Moscau guarda adina dapli encunter sid.

1) «Ost-West. Europäische Perspektiven», 2006/1. ISSN 1439-2089. Adressa: Matthias-Grünewald-Verlag der Schwabenverlag-AG, Senefeldstraße 12, D-73760 Ostfildern. Posta elettronica: mail@gruenewaldverlag.de
2) Der Fischer Weltatmanach 2006. Frankfurt/Main (Fischer Taschenbuch Verlag, ISBN 3-596-72006-0) 2005, chavazzin «Iran, p. 233».